

永平府志卷之二十

萊陽宋 琬遺次 府學訓導徐 香叅訂

蕭山張朝琮續纂 盧龍教諭胡仁濟校輯

人物後

韓昌黎曰莫爲之前雖美弗彰莫爲之後雖盛弗傳  
是知後賢之遞起不特關一代之景運實前哲之相  
映而愈輝者也

國朝定鼎六十八載積累既深文明丕著故人才之挺生  
於北平者從

永平府志

卷之二十

一

龍昭夾輔之勲擁節豎股肱之績或作干城或稱父母或  
德行文章可以維風而華國休哉何才之隆歟余職  
忝刺史愧不與諸君子列而復不能道揚徽烈以爲  
邦國光是益之愆也故始之以見聞繼之以搜羅終  
之以考訂後人披覽之餘知

聖世英奇追踪勝國

興朝聞望媲美漢唐炳炳蔚蔚亦足以光前哲昭來茲矣  
顧豪傑之生際時彌盛倘克自振興接踵而起此繼  
輯者之深幸又余所拭目而俟之者矣

國朝孟喬芳字心亭永平人以世胄從

世祖定鼎燕都簡任川陝總督三輔以外實惟憑籍時叛寇  
賀珍連賊數萬圍攻西安聲勢震撼公親御敵樓鎮靜無  
嘩城中市沽不變若不知有賊者遣總兵陳德軍西門任  
珍軍北門突衝賊營斬其驍獍復會援兵合力追擊直抵  
永壽斬首萬計公身不解甲目不交睫者七晝夜未嘗言  
瘁嗣有河西猗獷之亂兵號百萬朝議將發大師公疏請  
以身任督標將星馳秦州密授總兵馬寧張勇等奇策以  
精騎五百夜擣賊營悉驚潰遂解鞏昌之圍并恢復五涼

永平府志

卷之二十

二

甘肅擒斬米喇印丁國棟等而河西遂平山西姜瓖餘氛  
勢逼太華公奉命疾馳移兵朝邑聲揚航河陰令總兵趙  
光瑞就潼關飛渡一戰復蒲版再戰破陸村三戰平芮絳  
逆魁授首餘黨出降太行以西華岳以東莫不懷德投誠  
會寧夏告警公計連間諜誅擒梟孽而興安之釁永消從  
此崤函高枕無憂矣總公雄才偉略氣度寬和且能隨材  
任使宥過賞功故士皆樂用所向克敵凡屬吏將校及紳  
士編氓莫不畏威戴德順治十一年卒於官

勅賜祭葬贈太保謚忠毅入祀鄉賢子熊弼襲世職

蔡士英字伯彥號魁吾襲錦州左屯衛千戶明天啓二年  
改入永平衛順治元年從 英王征李自成三年從 經  
濟王收福建四年陞都察院左僉都御史尋陞左副都御  
史六年征姜瓖克汾州下潞安所向建功秋毫無犯九年  
陞兵部右侍郎巡撫江西時當大亂之後重以災荒公私  
赤立公至請免積逋二百餘萬瑞州府自明初奸民黎伯  
安袁州府自僞將歐祥投冊浮開民糧久爲二郡累且三  
百年來戶口日耗公考求前元故額反覆陳請得減浮糧  
二十餘萬石爲二郡永利初下車值勦叛用兵庫無匝月

之餉廉知州縣解銀苦藩司胥役勒索令解役赴院掛號  
設長牌差押司吏卽日兌收有勒索者立杖斃三人於是  
解者雲集兵得宿飽先公未至撥江南銀十七萬協濟猶  
時告匱公受事未二載解部銀四十餘萬完漕米五十七  
萬八千有奇遂停協濟乃分遣將領擒斬土寇劉京李文  
苻烈蘧穎等各郡底定招流民開荒地二萬餘頃買牛築  
室親行區畫且請開山採木江西之民賴以安業復修白  
鹿洞及白鷺鷥湖書院澹臺祠滕王閣薦福寺碑百廢具  
舉士風駸駸振起當大兵克南昌廢紳舊族波累叛黨公

察其無罪盡釋之其在山澤者以文檄諭之皆出爲平民  
十一年冬陞兵部左侍郎總督漕運兼巡撫鳳陽等郡於  
次年二月下旬抵淮時重運未來回空尙阻公僱民舟通  
融接濟凡五閱月畢達京倉在淮二載減兌耗覈盜折正  
身率屬東南依公爲命以疾乞休歸十六年海氛內訌瓜  
儀失守復起公前任時江北大水流民載道公捐俸設法  
散米賑粥全活數十萬人復請蠲淮鳳徐揚四郡銀三萬  
餘兩米麥二千五百餘石期年之間歲稔民和又請復舊  
制分設巡撫駐泰州而公專督漕務尋陞兵部尙書十八

年冬再乞休歸公以至誠感孚特受

簡注故所上無不朝奏夕可抵淮之初嘗以長運滋弊欲倣  
唐人轉運法分達淮上濟寧德州三倉轉遞貯漕盡去長  
運弁丁歸之官收官運使江船不逾淮淮船不逾濟濟船  
不逾德德船直抵京倉爲 國家無窮利雖事未果行其  
訃謨實可垂後康熙十三年卒於京

勅賜祭葬謚襄敏勒碑入祀鄉賢四十年

皇上巡視淮黃追念公輓輸勞績迄今頌 河干

時書奏績東南扁額以 賜子四長毓貴早世次毓榮雲貴

總督加綏遠將軍次毓華遵義知府季毓茂京口副都統  
毓秀其猶子也亦以公廕任永寧知州孫十四貴子瑋原  
任慶陽知府榮子琳原任內廷職事食主事俸珣原任海  
鹽知縣璣璵璠璣璣未仕華子珍舉人原任監察御史  
琦候補按察使茂子瑜良俱官叅領湘未仕

楊文魁號近樓永平衛人 國初以副將從征宣力屢立  
戰功擢工部左侍郎凡條議時務精練豁達前奉差監修  
奉天諸

陵寢樓櫓橋樑暨寺塔大砲諸工俱先勞鼓舞勞績懋著

永平府志

卷之二十

五

劉良臣字心伯永平衛世襲以軍功授遊擊勦平流寇歷  
陞甘肅總兵掛平羌將軍印卒於陣贈右都督進光祿大  
夫子澤洪總兵襲廕

崔尚樸盧龍庠生被俘至遼改姓名李嘉賓應試復入庠  
國初授新蔡尹清廉慈愛邑人尸祝陞南康郡守遇金王  
之變鳩衆堅守城守守備內叛遂被執罵賊求死不得偕  
配吳氏投環死事定議贈廕惜無子

呂鳴夏字九三山海衛人明萬曆乙卯舉人天性孝友弟  
鳴雲歿於王事遺孤幼呱撫訓成立婚娶遊庠輿論重之

初仕清豐諭補束鹿訓課有方陞真定郡丞分駐宣鎮以  
抗直取忤掛冠歸里明末賊逼關門時公家居佐義殲寇  
錄功補衛輝郡守時天下初定撫安百姓政績稱最擢僉  
憲備兵固原值降將武大定等謀叛以兵脅公不少屈歷  
數其罪罵不絕口遂遇害事聞

勅賜祭葬贈光祿卿廕入祀鄉賢

呂鳴章字太呂山海世胄嘗遵父命讓爵與弟順母心讓  
產與弟以官廕子侄又爲亡侄立嗣其孝友如此以明經  
筮許州判官當事重其才任以撫寇深入壘巢能不辱命

永平府志

卷之二十

六

比旋寇叛躬率家丁巷戰力保危城百姓尸祝之尋遷京  
秩以內艱歸甲申革命佐舉義旅大戰石河努力殲寇錄  
功補戶曹郎歷陝西道叅議以忤過客致政歸家居二十  
年問耕課讀清素自甘子燂如由貢歷黃陂宰

曹時敏字捷音山海庠廩生順治元年錄功授鄉寧令改  
補靈璧性倜儻多材藝長才卓識藻鑑超人

穆齊英字羽宸山海衛人由貢監順治元年授商城縣丞  
以子貴封奉政大夫生平敦義讓重然諾望重鄉邦子三  
長爾謨登丁亥進士歷萊郡守

馮祥聘山海衛人順治元年錄功授齊河令陞長沙郡丞  
事孀母曲承養志教及門善誘成材叅贊宣勞循良著績  
齊河建有專祠

卜昌運字泰寰東勝衛人文行卓犖豐潤董氏延爲師彼  
族惡少獲罪董夜持金乞援公力卻解之董御僕嚴一奴  
負愆懼責以銚刀自斷其首奴家訟金吾戚友皆避去公  
走京師力爲昭雪友人韓鼎業遘家難漁利者啓釁不已  
公挽鼎業哭韓氏家廟中曰吾不意子豪傑自命竟爾爾  
耶韓慚謝兄弟和好如初順治二年貢除南官訓遷東光

永平府志

卷之二十

七

諭群盜猝犯城公率家僮登陴奮呼隸卒駁擊渠魁城賴  
以全擢知江都縣卒于官

馬維熙字天御山海衛人由拔貢順治三年錄功授忻州  
同知署偏關西糧廳篆值姜瓖之變山右一帶搖動偏關  
闔城皆從逆公獨不屈乃圍公別所遣人守伺久之守義  
愈堅遂加害事聞贈忬州知州

劉光裕號小峰遷安人居鄉樂施尙義慈愛謙恭撫孤侄  
嫁族女助喪賑饑盛德積累鄉人號之曰劉佛以子鴻儒  
貴贈兵部右侍郎入祀鄉賢

劉鴻儒字魯一號澹逸遷安人登順治丙戌進士初授兵科給事中時當改革吏胥爲奸賦無定額公首疏請頒賦制以甦民困略云臣遷安人也目擊遷安正供之外派擾滋甚推之一縣如此則一郡可知一郡如此則合省可知合省如此則天下可知于是罪責郡縣苛政乃除里民至今德之尋遷戶科疏論三事不應圈占民地爲禁旅莊田不應抑勒平民爲投充人戶又逃人之禁太嚴窩主坐以大辟宜減從輕皆同列所不敢言者咸危公公不爲動賴諸大臣救免疏得留中旋以糾鉅鹿縣某謫上林苑蕃育

署署丞以憂歸已而

詔三事悉如公疏

特旨以原官起補兵科益感激圖報簡無虛白遷戶科都給事中疏陳京東鹽法語尤切直同列者復危之公意氣自若陞順天府丞左通政太常卿通政使歷兵部右侍郎戶部左右侍郎擢都察院左都御史密疏請免江南逋賦及疏論封疆大臣不宜拘以文法爲給事中成性所劾部議鐫二級調用遂拂衣歸里杖履優游日往來于黃台三嶺間晚年益好吟咏工書法復究心濂洛關閩之旨生平不

屑治生祿賜之餘周及宗黨顯要三十年惟圖書自娛蕭然寒素卒年八十有一所著有四留堂集行世

石申字仲生灤州人明副使維嶽公子登順治丙戌進士選度吉士館試屢膺第一視學江南搜拔孤寒所取士多掄大魁歷遷學士經筵久資啓沃擢吏部左侍郎矢公無欲門絕苞苴以抗中忌奪職後事定起補刑部左侍郎上慎刑疏天下傳誦丁繼母艱服闋補戶部左侍郎總督倉場舊例厨饋交際取資斗級衙僧藉恣吞啗公一切罷去綜核無遺釐清夙弊值慈母計聞歸里嬰疾而卒

永平府志

卷之二十

九

勅賜祭葬

李成性遷安人登順治丙戌進士任新城令撫綏殘邑克著循聲未幾乞休歸隱居山莊讀書嗜古耄年弗倦鄉人推爲理學先型

蕭竒楹撫寧人總戎蕭陞孫任臨清叅將居官數載持身冰蘖林居食貧無所干謁鄉黨重之

崔聯芳字子宗山海衛人父出遊五年不歸順治丙戌應順天鄉試榜未發聞父凶信不知死所日夜號哭幾不欲生比揭曉已膺鄉薦不顧歷四省尋屍若有神示於河南

確山縣得之負骨歸葬咸稱爲誠孝所感兩經部選高隱  
不仕年八十三卒

劉克孔字扶宇山海衛人由拔貢順治三年授平度州佐  
遷温州通判歷六安知州潞安同知所在有治聲去後咸  
歌思不忘康熙初陞汾州知府愛民禮士聽斷如神治汾  
十年考績稱最晉三品秩

余一元字占一號潛滄山海衛人登順治丁亥進士初授  
刑部主事遷禮部歷儀制司正郎冰蘖矢操端方謹飭時  
以清正稱加從四品告疾還里閉戶著書屢徵不起立社

永平府志

卷之二十

十

講學啓迪後進從不干謁有司若事關學校及地方興除  
大務必力爲救正遠近倚爲師表所著有潛滄文集八卷  
重修山海關誌

胡來相號玉衡永平人事親孝謹居恒言動每以古人自  
期順治四年筮仕元城令時萑苻未息大河以北騷然煽  
動天雄爲畿省要地公矜撫流亡人心賴以寧固且開諭  
恩信賊相繼降附以卓異擢山西道監察御史有謇諤聲  
巡按湖南首以除盜爲已任區畫戰守動中機宜尋掌河  
南道陞太常寺少卿卒於官子三祝歷河南道御史

管聲揚字鳴鑾號龍崗明崇禎己卯舉人國初任常州水利通判操守清廉職務勤慎釐整鹽法清理糧務築堤濬塘大興水利丁內艱服闋三院交章題薦以疾辭士論高之子鞏祚邑庠生謹厚尚義孫三伯季俱庠生仲名標康熙丙子舉人

高顯辰字欽思灤州人順治戊子舉人授德安令擢補南寧郡丞陞雲南守時吳藩赫奕麾下虐民輒移文該管諷刺之或途值卽面叱其非上官同僚每勸勿撻其怒應曰吾輩

天子之吏何可詭隨異姓王之帳下兒耶卒以是得禍當吳逆之變也逼司府入欲授僞職公抗詞懇拒幾斃杖下遂放於北洱自此絕音耗後有自逆中歸正者言當放時公配戈氏已自經賴同官某收殮之又傳公於己午間病卒亦其人合殮二子不祿僅二女其次適滇臬李公興元子毓秀隨公滇任李同時受禍更慘其家亦不可問矣  
崔維嶸字嵐峯明甲子舉人啓亨公子年十四被俘至遼太宗簡視俘獲知爲啓亨子曰是求死不作知州人子乎勉事吾勿辱汝父也順治五年以貢授清豐令時 畿輔盜

賊未靖躬率親屬戰捕殲渠魁釋脅從豐邑遂安陞興安知州招集逃亡貸粟勸墾期年民用輯寧因防兵擾民公執法繩之與守將忤竟鐫級歸遂絕意仕進在廷故舊招之不往晚年廬於漆西先塋者九年鶉衣糲食惟一蠢僕傭日以給每晨起哭拜母墓手掬土培塚植木四週子廷瑜中康熙癸卯舉人任全州刺史解組歸迎養玉田堅不允所奉悉揮却之後廷瑜浼郡守梁公世勲慫勸就養因屬廬令訪之見癯然老叟問此有廬墓崔太翁否公對曰身卽崔姓念少失父母髦年無所爲故待死故丘欲附葬

墓傍耳廬墓之名曷敢當令爲感動因坐土室接談移晷見其語語至性竟不能致意而歸年八十有六卒

房星燁字拙如永平人順治五年貢授睢州牧興利除害不畏權勢陞漳州知府耆民爭相肩輿泣送數十里其治漳設隄防嚴城守閩南倚爲保障

張鍾英號瑞峯其先遼東義州衛人以父玳於天啓時司諭廬庠遂家永平公由順治五年貢筮定陶令甫下車土賊糾衆圍城公率衆堵勦射中賊渠餘黨悉平於是除荒蕪招流離重賓興復鄉飲治行稱最陞黃河同知去陶日

士民鑄石德之癸巳河溢堤決石香爐富家集南北一帶  
居民漂溺公住守河干多方築節物力恤夫役民之居  
者役者胥賴安全陞福州知府以修河積勞未任致仕  
趙映斗遷安人登順治己丑進士任吳堡令邑殘民貧加  
意撫綏不事紛擾因奎誤鑄級事白補馬邑廉能有聲  
翟鳳翥字儀軒盧龍人少孤力學素履端方燕居雖盛暑  
必冠以明經司訓平山見學宮傾圮竭力倡修年七十餘  
予告歸猶披覽經史弗輟子二長儁次任俱庠生任幼失  
恃事繼母以孝聞父喪哀毀盡禮生平盛德尙義咸以長

永平府志

卷之二十

十三

厚稱孫正經康熙癸酉舉人

張星煌字斗輝盧龍人由拔貢以通判改授襄陽衛經歷  
代篆宜安及均州事治政明決督撫漕三院薦最陞東昌  
同知冰蘖矢操代州事奎誤回里與同志講學問字食貧  
不怨溫良之度人樂近焉

崔巍字嶽生號坦菴盧龍人幼孤崇禎庚午郡城陷母王  
氏度不能免亦自經依兄嫂避難兄嫂利其產百計死之  
賴母叔王如梅密收養之王業農弗令就學年逾冠里胥  
欲派以倉役公恥之遂發憤力學入遷安庠後益自攻苦

遍涉經史繭足走京師受春秋于歸安尹平之先生領順  
治丁酉鄉薦就武邑諭修學舍課生徒鐸聲丕振公留心  
理學議論一宗紫陽時講學者多排詆陽明公曰致知之  
學孔孟真宗且陽明先生直諫勤王功在社稷真以身講  
學者若隨俗以異端斥之不但得罪陽明亦紫陽所不許  
也壬子夏遇容城孫夫子高第弟子魏蓮陸相與議論知  
孫夫子之學欲用朱以救王學之虛用王以疏朱學之實  
總期于深造自得遂遙爲納贄期秋盡率門弟子遊百泉  
面相質證忽遭疾卒年四十八子三長璠拔貢次璵庠廩

永平府志

卷之二十

十四

生季璨翰林院庶吉士

房星煥字皓如永平人由籌海功順治十五年授南康通  
判壤接湖山萑苻時發公下車卽捐俸修理城濠設礮砲  
立旗幟盜跡遠遁以才能調兗州泇河通判修舉廢墜百  
姓勒石紀德尋陞武德道副使卒於官

張師聖遷安人讀書善騎射以將才任金吾守備陞靖海  
叅將簡練軍士整飭防汛數年海上肅清順治中陞山東  
登州副總兵未離任海寇旋發督撫令將兵進討沒於陣

詔廕卹

汪淑問字清公號邁陶束勝衛人幼失怙恃事祖父母孝謹承志嘗履險曲全叔事以妥祖心登順治己亥進士筮犍爲令邑當草創居民僅六七家公竭慮撫綏增井安民著有實效未幾以罣誤解組士民擁馬首號哭失聲生平篤交誼宦蜀時貧苦不能自存猶解俸以急友難客武昌幕力贊開死罪存留養親之例迄今永著爲令山左郡縣感公默全之德多尸祝之居鄉謙厚古道爲一郡典型者垂五十年數舉鄉廩所著詩文集若干卷藏於家壽八十五有五卒子三長與臨次與賁俱庠廩生季與恒康熙庚辰

永平府志

卷之二十

十五

科進士

王簡字咸一號莘雲撫寧人由恩貢任莊浪令服官清正綽有能聲退歸林下澹泊安常志期超卓時皆欽重之馮泰運字羲軒撫寧人由貢士任溧水令吏治精敏嘗捐貲二百餘金助修撫寧學宮及製銅冶祭器二百餘件以

光春秋祀典

朱爾怡字昆和明己丑進士文運公曾孫父鼎嘗舉德行怡府庠生改奉天中順治庚子舉人三任廣文鐸聲丕振陞沂水令任事百日緩征恤民歡呼載道值水災致仕時

年八十有六一堂四世寬和任恤宗黨以古君子稱焉  
李煒然字含醇 龍人由貢生以州同改授江川知縣邑  
數罹兵燹百姓流亡公發粟招徠多方安輯以土司變解  
任士民鑄石德之

宋國賓遷安人由恩貢筮隆德令剛方果斷卓有政聲家  
居讀書山莊人重其品

馮隆運字明軒撫寧人由貢士筮長山令慷爽明斷士民  
欽服及還里篤友愛崇信義解紛周急鄉黨稱之

蔡毓榮號仁菴襄敏公仲子誕有異徵弱冠授佐領選刑

部河南司正郎順治十七年隨征楚寇又調征鄭國信海  
氛既靖紳士多羅僞籍公矜釋甚衆還部會科場吏議下  
西曹牽引者賴公得白有兄弟爭玉笋待質公動其天性  
氣俱平卽以玉笋壽弗受二人感泣以玉笋碎訟庭石遇  
宦者橫於市公執而撻之宦者訴

世祖前問狀公俯對曰臣何敢撻宦者撻虐民犯法人耳  
世祖顏頓霽仍以宦者令公加責聲振長安晉京畿道御史  
襄敏公居總憲峙樹風節公繼之行避驄馬時稱爲大小  
繡衣晉內秘書院學士歷刑部左右侍郎康熙六年

覃恩封光祿大夫七年晉吏部左侍郎澄清銓政多所建白  
向舉人下第祇授教職公闢正途上揀選知縣之議迄今  
垂爲令典九年總督川湖

上親解袍賜著體猶溫不匝月泣荆渡漢巡蜀振綱肅紀薦  
賢抨墨措兩省事如在眉睫十二年吳逆逼荆江公悉力  
守禦一夜鬚髮盡白兼攝提撫兩印務十七年四月出洞  
庭湖十八年正月開岳陽

詔命爲綏遠將軍統率各省官兵相度地勢惟辰龍一關踞  
立巉巖飛鳥難越獲賊間諜四給劄賞金分用爲嚮四面

永平府志

卷之二十

十七

夾擊公直衝正關捫蘿攀壁奮登破賊乘勢入黔師次貴  
陽賊焚鐵索橋公卽飛渡仰擊二十年二月師次安南且  
勦且撫諸郡歸順直抵滇海出奇疾擊賊幾盡賊鼠竄孤  
城倚滇池汨活澎濞師難猝渡公占要密圍作檄射城令  
擒逆首圖自新城中感激門洞開斬渠魁謀主餘黨潰散  
衆議欲屠之公不可遂不血刃雲南平卽

命總督雲貴軍務先是襄敏公卒於京

上恐傷公心誠勿計踰年始知痛哭幾絕請守制不許未幾  
元配閔夫人亦卒公總不以私事分殺敵心及恢復上疏

辭印

上以巖疆甫定留撫綏二十五年移總督倉場尋轉兵部左侍郎平南之役公賴

廟算如神兼 諸王大臣同心戮力以致奏凱計功論過難  
答

高厚遣黑龍江親串悲行路公曰炎風朔雪同在光天化日之下我躬擐甲胄出萬死中甘之如飴豈以道路憂至遷所十年身親戎役稍暇閱經史講忠孝大義時羅剎跳梁兩次隨征三十五年

永平府志

卷之二十

十八

賜環歸里猶在軍前効力馳驅兩載三十七年十一月  
聖駕東巡回跪迎道左蒙

聖恩垂問年齒三十八年正月偶得疾呼家人囑曰我生多愧汝輩上念世澤倘有寸進必捐糜踵頂以報

國恩捫鬚端坐而卒

孟熊臣字輔昌永平人忠毅公猶子由蔭生初知保德州治政明恕不事敲朴嘗稱貸二千餘金代民償逋秩滿陞汀州郡守時海氛未靖軍務繁興汀屬不困于粟米力役者咸公申請有方力也順治十八年攝漳南巡道篆奉令

安插海兵星馳詣杭請於東郊造營房以居之又具詳家  
口糧額俾不病民至今杭民德之家居謙和謹厚縉紳家  
稱由禮者以公爲最云

王可就字向明灤州人以將材任山東撫標遊擊勦巨盜  
王進周撥宣等又撫賊張正等數萬人以功陞延安府叅  
將值逆賊謝化竒等作亂設計勦平陞慶陽府東協副將  
閣部洪經略題調恢復雲貴鎮守偏橋其地有諸葛洞者  
江中多怪石舟楫不能通軍需皆民丁負運因召父老叩  
狀僉曰中有巨石高數丈石下有洞讖云若要此洞開除

非諸葛來自昔畏難輒止公慨然力任募石工勇慧者親  
爲經理巨石下得一碣有丁口京邊九十公之語乃武侯  
筆隱公姓名於中衆皆踴躍數旬成功土人勒石紀之以  
功陞杭州城守副將先是杭多猾賊素賄當道不肖者復  
左袒賊公與賊唐起凡戰敗之兵道某反謂誤入平民爲  
盜因與抗論事白督撫遂專任公起凡密遣賄說公不出  
戰願代爲夤緣得總戎公怒曰逆賊視我爲何如人哉誓  
必滅此朝食于是元旦會兵圍其岩親登手刃之餘黨降  
起凡兵稱百萬爲杭害者幾二十年至是始平

上嘉其功加陞榮祿大夫署都督同知賜蟒玉封三代任杭  
時總督被江賊劫所佩刀急召與議公獻策阻塞沿江便  
路置塘戍守率兵嚴捕江賊遂平尋陞福建副總兵以都  
督同知署總督標下中營事詣 闕陞見

上親臨試射授雲南臨元澂江等處總兵官時吳逆變作復  
召見賜綵緞二表裏且諭曰可速回閩密察耿藩恐效尤吳  
逆也遂星馳踰仙霞嶺尚不知耿逆之變逆密遣四僞官  
要於途日夜嚴防不容死既至圖乘間誅逆謀洩迫趨都  
尉府度不能免仰天嘆曰大丈夫不能爲國除賊夫復何

永平府志

卷之二十

二十

言舉家號泣隨之不顧遂遇害年六十二

上憫其忠賜祭廕二子長應麟任榮昌令次應薦性至孝以  
母老不仕居鄉任義周恤於公歿後四年卒廡妻趙氏甫  
二十二歲事姑甚謹泣語家人曰吾上有七十歲老姑下  
有不更人事幼子慮不能承歡憂勞成疾不數月亦亡  
喻成龍字武功其祖父從

龍定鼎入籍灤州公弱冠以恩廕任江南建德令廉明仁愛  
膺卓薦值吳耿叛時公雖離任撫軍壯公才略分兵協勦  
親冒矢石所向披靡獲從逆姓氏簿卽付祖龍保全實多

士民不忘遺愛勒碑塑像迄今蘭臺山猶尸祝焉題授池  
州郡丞督軍需赴荆岳勞績茂著卽題授本郡守當軍興  
旁午督造戰船刻無寧晷公猶加意民食所屬各建義倉  
積穀民樂輸至數十萬石不報上司無掣肘遇歉分給民  
不苦飢勅建書院禮請學博置學田積藏書暇則與生童  
討論俾從事經濟實學池於江南爲小郡一時彬彬稱極  
盛焉丁內艱去池補江右臨江府地瘠民貧公撫字噢咻  
循聲大振擢山東漕運轉臬藩連任山左俱有治績適遼  
東歉收議令撫軍由海運粟濟荒

永平府志

卷之二十

二十一

詔特委公載糧百艘星發海若効靈不揚波者數月活遼民  
萬億一歲之內晉月卿廷尉少司空三遷顯秩人皆以爲  
榮公悚惕益甚乙亥歲北鄙跳梁復

詔公運糧兩經大漠直窮西海軍食未嘗稍缺叙功轉少司  
馬奉

命看河敷陳無不報可因發帑修築同事九人凡所建豎多  
出公裁漕運賴之覆

命顧問諄諄條對悉當

簡總督湖廣隨

駕南巡

恩賜華袞扁對詩章字帖等寶甚夥甫蒞任會征紅苗勦除  
十餘寨撫綏五百餘寨恩威互施楚地以寧解組歸灤闔  
門養望以讀書吟咏自娛有詩集行世嘗見許於王阮亭  
諸辭伯君子以行藏無愧稱公云

穆廷栻字符公山海衛人康熙丁未科武進士初任蔚州  
守備陞四川提標遊擊整飭營伍愛恤士卒川陝提撫咸  
以才勇保舉膺卓薦擢威茂營叅將永寧協副將

特授蘓松水師總兵屢覲

永平府志

卷之二十一

二十二

天顏備邀

聖眷扁書衣食

寵賜甚多公性情謙和操持謹慎自始仕迄今令聞遠播綽  
有古儒將風

韓坤業字子厚府庠生父原潔崇禎庚午歿於兵燹母王  
氏苦節四十年撫坤成立自幼事母盡孝內外無間言母  
歿廬墓三年哀感行路日手抔土迄今高塚巍然康熙九  
年題旌建坊

徐從新撫寧庠生母性嚴從新凜遵承順生平任俠急公

人服其義本縣扁旌其門

徐進孝撫寧人父患心疾貧不能延醫禱神許愿疾愈愿莫償疾復作進孝割胸前肉如掌禱還神愿疾竟瘳以肉掛廟樹上經數月不腐鷹鳥亦不忍食咸謂至孝所感有司表其閭

陳柱國盧龍人康熙十一年任樂亭駐防把總盜伺縣尹公出詐爲行客入城肆劫柱國挺身與鬪中流矢被獲縛令導引柱國裂眦厲罵遂遇害事聞

詔賜銀百兩襄葬事

永平府志

卷之二十

二十二

蔡珍字左才襄敏公孫遵義守毓華公長子康熙壬子舉人授中書舍人陞典籍轉寧武關同知勤慎練達治績著聞秩滿遷督部員外郎補禮部陞工部郎中別歷曹署守正不阿擢監察御史風裁謇諤直聲丕振

張翰宸昌黎人以明經任翁源令多惠政擢長沙郡守潔已率屬治政廉明聽斷活無辜九人獄無冤滯致政歸捐資課迪後進值歲歉煮粥賑貸待舉火者不下千百家邑人感之請祀鄉賢

劉偉字遠公灤州人幼嗜學性倜儻不羈父冒泰以明經

司諭定興公省侍克承庭訓爲文博雅堅勁康熙乙卯韓慕廬先生主順天鄉試闈中得公卷大加欣賞定第一行稿出傳誦遍天下數因公車益自奮勵乙丑捷南宮選庶吉士丁卯授監察御史巡視東城風裁高峻聲著臺班卒於官遺藁蕭然足徵操履之潔清矣

張宏字宥涵昌黎人由選拔初任肅寧教諭課士勵行丕振鐸聲遷知新昌縣潔已愛民實心敷政革除日用米燭及里長更役陋規修學課士勸農墾荒徵收不取耗餘弭盜力行保甲剖決疑獄咸服如神蒞新五載兼攝岷篆清

永平府志

卷之二十

二十四

正慈祥始終一致已列薦舉忽疾卒士民哀慕崇祀新邑名宦子四蕢夔著俱庠廩生蔚康熙乙酉舉人

劉從性撫寧人性至孝母年八十二臥病不起性刲股禱神病遂愈草野愚民可謂終身孺慕者矣

高培昌黎歲貢純功邃養屢試冠軍教誨生徒不干世務子二長天曉恩貢仲天挺康熙甲戌科進士初任臨淮令克著循聲贈父文林郎今補隆昌

趙名元撫寧庠生母卒廬於墓俱晨昏哭奠三年始歸康

熙二十年奉旌

姚延嗣字振公樂亭庠生天性孝友睦族撫孤多藉成立  
遇貧乏不能婚葬者周助從無德色樂邑學宮頽壞公於  
康熙甲辰年首先倡修殿廡一新又奎樓久廢力勸建之  
生平樂善好義類如此子采以選拔任國子監學正  
詔贈公如其官康熙二十九年奉文崇祀鄉賢

倫品卓字宣明灤州庠生性倜儻不羈以選拔筮仕江西  
南康倅治有循聲康熙辛亥南康大饑公貸請帑金三千  
兩買運減糶康人賴之康地處下流舊制米交漕運舟多  
漂溺若上倉發兌靡費不支公力請督漕以康米竟達京

口著爲例至今稱善壬子押運力除私折盜賣諸弊先期  
抵通倉漕合疏薦舉值康守乏卽擢典匡郡公重士保赤  
習俗丕變重修白鹿書院郡學講堂甲寅冬饒賊逼城守  
兵寥寥公激勸鄉練乞援會勦日戰三捷殲渠獻馘

上嘉其功勅部議叙會丁外憂以金革奪情復計撫僞官百  
二十餘名僞兵七千餘人餘孽悉平無何失意重臣遂解  
組歸徜徉詩酒壽至八十有五卒子三長可久任陝西慶  
陽府同知仲可大任山西澤州知州季可經府庠貢士  
張霖字汝作撫寧人幼孤嗜學弱冠遊庠由貢生任工部

營繕司主事以母老告歸顏其堂曰愛日色養曲至宅憂  
哀毀盡禮起復補原曹尋陞陝西驛傳道

上念陝爲巖疆欲增置道員難其人廷臣交薦公

制報可時陝饑民多流亡公設法捐賑全活甚衆遷江南上  
江按察使治獄多平反會皖江兵冗議裁軍士洶洶譁當  
事門公推誠諭慰遂輯論者謂非公事且不測遷福建布  
政使舊錢糧解藩有羨耗陋規公悉除之生平慷慨樂解  
推待舉火者不下千百家尤喜爲詩古文詞與四方知名  
士唱酬無虛日加意桑梓人文於邑學宮旁創義塾十餘

永平府志

卷之二十

二十六

間祖仲科父希穩以公貴

誥封光祿大夫子增候補光祿寺典簿坦壘俱康熙癸酉舉  
人壘任中書科中書舍人垣候補光祿寺寺丞墀候補主  
事

遲震起字茂先昌黎人少食貧事親以孝聞居喪哀毀骨  
立後入太學 恩例應除翰林僚屬性恬退不喜仕進生  
平謙和樂善從無疾言遽色宗黨咸以長者稱之子二長  
日旭初宰浙江浦江嗣宰湖廣黃梅遵庭訓克著循聲次  
日昶歲貢生公以旭任浦江 封文林郎

高翹昌黎歲貢操行耿介教子義方子三棠芾棠萼棠蔭  
伯季庠廩生仲登康熙己丑科進士

王監字于隰灤州人性嚴重不苟嘖笑生平重然諾樂獎  
後進而尤敦族誼凡婚喪藥餌棺物及急難事施濟難更  
僕數於孝義節烈更加意曲成與人交不以生死變易年  
八十卒進士汪公淑問爲著考終錄事甚悉子四伯仲早  
世次代出繼季遂功府庠生

倫可大字子受灤州人髫年爲諸生隨父品卓之南康任  
適滇黔逆警左右其父於軍前屢建勞績寇平父爲大吏

誣劾公奔走幹旋事遂白初任西蜀新津令當蹂躪後邑  
無城郭祇穴處二十餘家公斬荆棘招流亡墾荒除賦五  
年生聚轉瘡痍於衽席薦陞粵東化州牧其被兵與津等  
積十三年未完逋課紳衿咸遭繫辱公概與寬釋致鐫十  
五級甘之如飴而逋亦竟蘇丁內艱服闋補山右澤州杜  
絕苞苴革除陋弊時有齟齬以白金三千賄卽白上司奉  
有加級

優旨在澤十年手著濩澤政紀可垂治譜會私鹽被巡役殺  
死梟民憤激搆禍公與叅戎率兵往視梟民疑商人買囑

兵弁聚衆對壘叅戎卽欲屠戮公以蚩蚩愚頑不忍血刃力爲抗阻因單騎親入痛哭陳諭梟民感泣羅拜旋卽解散無知得免羅織遂干望誤去澤之日民扶老攜幼攀轅號泣建立生祠公歸里後州人屆公誕辰必聚會稱祝至今弗衰後聞公歿於家遠近老穉匍匐赴祠號奠者旬日其德澤深入人心如此大學士澤州陳公廷敬親悉善政誌其墓

張應宿昌黎貢生長沙郡守翰宸公子性慷慨重然諾恤貧周急毫無德色舉鄉飲賔

永平府志

卷之二十

二十八

崔璨字淡餘號茗菊武邑學博巍季子五歲孤九歲五經成誦康熙癸酉中副車貢入成均巳卯鄉舉第四魁麟經巳丑成進士選庶吉士性恬靜篤孝友事母色養備至嚴事兩兄長兄性剛怒責卽長跽以請非怒解不敢起自童子至庶常皆然生平無疾言遽色雖貴益自謙抑善詩古文詞著有式好堂集藏於家年四十三忽遭疾卒於官徐進禮字天一山海衛人賦性醇樸少貧以勤儉力自振興與人交忠信和易尤篤友愛兩弟早世遺孤穉齡撫翼教誨迄今二十餘年同居無間今年及七旬列名國學未

嘗一至公庭有古君子風

謝丕智字若愚山海衛人府庠生事親誠孝母病湯藥親嘗衣不解帶者兩月病轉劇乃焚香虔禱割股投藥母遂痊康熙三十二年學校鄉隣公舉孝行郡守梁公世勲旌其門

李毓元字儲英灤州人慷慨尚義一諾千金家設義塾以訓族子歲解私橐以周親知急公排難之舉不可勝紀康熙四十二年出粟一千石賑濟復捐助義倉五百石大學士安溪李公光地撫直時匾旌曰社儲倡義子楨綽有父

永平府志

卷之二十

二十九

風

吳元臣山海衛人性至孝母病危篤醫藥罔效乃焚香叩天割股投藥母遂痊康熙四十二年公舉孝行有司旌之夏曰瑚灤州庠生父輔明於崇禎九年隨叔建中之扶風縣佐任死於流寇家人負骸骨歸瑚甫五歲賴母聶氏苦節撫訓遊庠自幼事母曲盡孝道母病密爲嘗糞及歿哀毀逾常七日不食竭蹶殯葬廬於母側日夜哭泣哀感行路及三年歸猶日三至墓呼母不應號泣而反至老病必扶策往雖風雨無間

穆維乾字介公號圭炎天性孝友學問淵博領順治乙酉鄉薦司諭滑庠及遷保定左衛教授整飭學規精勤課士嘗攝滿城邑篆值旱荒設法賑濟全活甚衆撫臺金公疏薦云行同濂洛關閩才類韓柳歐蘇真實錄也陞翰林院典簿時修四書滿漢講意至羔裘元冠不以弔掌院葉公方藹爲犯

聖諱商於同僚俱不能對公曰大字仍原字以尊經小註改元字以避諱掌院詢何所本公曰中庸慎獨乃原字小註改謹字掌院大悟云余自幼疑此今始知朱子爲避諱也

永平府志

卷之二十

三十

深加敬禮歸休林下講學論道誘迪後輩殷殷不倦生平廉節自持不慕權勢自筮仕及卒五十餘年鄉望特隆張宗仕灤州人幼失怙事母盡孝及長喜讀孫吳書任俠好施明崇禎時從兵備張公春軍中屢戰有奇功授明威將軍順治壬辰癸巳間歲頻饑兩次輸粟一千八百石有奇賑濟賴全活者無筭郡守旌其門曰惠溥一方舉鄉賓又嘗捐渡船二隻水手四人置青沱河口以濟行人遠近咸感其德子起鯉任河防州同知孫瑛食餼州庠孝慈接武咸謂積德之遺云

田毓琦字瑞生昌黎人性孝友具才幹家貧力勤貿易生計漸饒事父母養生送死及兄弟子姪衣食婚嫁咸身任之嘗商於薊之上倉時河水汜溢堤將潰公出貲募夫塞堤得免水患所保全者不下數千家居恒尚義周恤延師課讀子永乾康熙戊子舉人

張朝臣字鼎望山海衛武進士任浙江處州協都司康熙四十七年遂昌縣土賊作亂公率兵赴剿至大拓地方山路左係樹林右礮下盡屬山田崖高路窄僅容一騎公不避危險奮勇身先殺賊被戮死事聞

永平府志

卷之二十

三十一

詔贈都司僉事加一級賜祭葬廕一子衛千總

王嗣昌字祖生盧龍庠生九歲失恃賴繼母陳氏撫育昌事之極盡其孝生平謙厚恬退課子義方子五長珍康熙丙戌進士瑜孝 力田仲季俱庠生

永平府志卷之二十終